

四庫全書

集部

欽定四庫全書

集部

文簡集卷三

一至三

詳校官中書<sub>臣</sub>葉元符

中書<sub>臣</sub>劉源溥覆勘

總校官原任中允<sub>臣</sub>王燕緒

校對官修撰<sub>臣</sub>戴衢亨

謄錄監生<sub>臣</sub>張鴻仁

欽定四庫全書

集部六

文簡集

別集類五

明

提要

臣等謹案文簡集五十八卷明孫承恩撰承恩字貞父南直隸華亭人正德辛未進士官至禮部尚書兼翰林學士掌詹事府謚文簡是集為其門人楊豫孫董宜陽朱大韶所編七卷以前為疏表講章皆進呈之作八卷以

後為賦詩詞曲二十七卷以後為雜文陸樹聲為之序承恩於嘉靖之初以庶子充經筵講官今集中所載正始箴鑒古韻語及講章即是時所作及官宗伯時齋宮設醮承恩獨不肯黃冠遂乞致仕較之嚴嵩諸人青詞自媚者人品卓乎不同其文章亦醇正恬雅有明初作者之遺樹聲序有曰國初之文淳厚渾噩彬彬焉質有其文迨關西信陽兩君子

出追宗秦漢薄魏晉而下海內藝學之士咸  
願執鞭弭從之標品位置率以人自詭先秦  
兩漢以希方軌雖體尚一新國初淳龐渾厚  
之氣或少漓焉公生長憲考朝博稽宏覽邃  
詣淵蓄故出之撰述類皆深厚爾雅紆徐委  
折論者謂公平生立言類其為人云云亦平  
允之論也乾隆四十四年三月恭校上

總纂官<sub>臣</sub>紀昀<sub>臣</sub>陸錫熊<sub>臣</sub>孫士毅

總校官臣陸費墀

文簡集原序

穀齋先生孫文簡公平生所著詩文屬公門人校次成集者總若干卷公歿子漢陽守克弘出以授梓問序於余余不佞何能為役往不佞釋褐公與關中馬文簡公實貳宗伯兩先生皆館閣宗鉅不佞辱公里閭後進數因之以幸承教兩先生兩先生所為推轂不佞已不佞入讀中秘書職史氏獲從子大夫後入侍交戟之內退而詮論作者大都國初之文醇厚渾噩維時鼎命方新

宇夏寧廓一二文儒應興運而出以當制作之任鴻裁  
瑰撰遵尚體要列聖紹休太蘇淳龐之氣萃宣人文炳  
蔚融鬯一時雋喆遙興登館閣以黼黻絲綸藻績帝謦  
者彬彬焉質有其文迨關西信陽兩君子出追宗秦漢  
薄魏晉而下之海內藝學之士咸願執鞭弭從之標品  
位置率人人自詭先秦兩漢以希方軌雖體尚一新概  
之國初淳龐渾厚之氣或少漓焉公生長憲孝朝夙挺英  
喆少壯登朝偶亨嘉之會洊歷華貫直承明著作之庭



博稽閱覽邃詣淵蓄故出之撰述類皆深厚爾雅紆徐  
委密不鈎棘而匠意閎深不瑀鑄而藻思芊縟不擬蹤  
而動引繩墨春容典緻卓乎大雅譬之冠冕佩玉委蛇  
中度鉶登在列蒼然古色要之體格取裁一軌于先正  
而出入馳驟在廬陵步武間論者謂公平生立言類其  
為人公直項不苟詞色淳靖廉退終始一節獨以忠實  
結主知當公宮詹時疏請建儲者三出閣講讀者二上  
庶公忠悃方嚮意公會公引年去不踰年召還公朝論

謂公旦夕且拜麻未幾公堅意乞歸矣昔宋陳恭公入相學士張安道草制麻獨叙其首請建儲謂功在納忠向令公不去即少須臾入正台揆功業可逆睹公竟高引使論世者惜公不究用於時乃余考按公立朝前後章奏懇懇誠至得老成愛君憂國之體即所施措雖未萬一試其經綸大指亦較然著矣余不佞追惟始進竊冀幸承教於公晚復承命序公之集因論次公生平并識其大者若此萬歷癸未夏五月賜進士出身資政大

夫禮部尚書兼翰林院學士經筵講官國史總裁前吏部右侍郎掌詹事府事陸樹聲序



欽定四庫全書

文簡集卷一

明 孫承恩 撰

箴

正始箴

翰林院編修臣孫承恩謹奏為端本始以隆治道事恭  
惟皇帝陛下承太皇太后大行皇帝簡命付託入繼大  
統神器有歸生民有主社稷幸甚天下幸甚臣惟天位

維艱不可不謹然尤莫當謹於初政之日初政者天下臣民拭目望治之始天意鑒觀以為去留治忽安危之所係也是以古人忠告於其君者莫不致意於是昨者陛下甫正宸極念承傳之重明發詔旨大新庶政謙冲退託圖治拳拳臣謹伏讀則任賢納諫愛民屏姦收人心慎爵賞振紀綱肅刑威凡所以端本始者陛下固已得之矣夫自古帝王之興未有不獲天人之歸而能永保治安者竊觀陛下當毓德名藩聖明之譽已洽遠近

及承命將至萬姓踴躍爭先快覩而至止之晨靈雨時降登極之際天清日熙及明詔之降父老感激垂涕謂不圖親見聖明天子與此太平景象天休震動人心歡騰非偶然也陛下真可謂極天與人歸之至矣天人既同治安可必則陛下所以上答下承者當何如哉夫始者終之對謹始所以善終善終必先謹始未有謹始而不能善終有罔終者則由始謹之未至也亦未有善終而不本於謹始少怠於初斯終之所以不善也陛下茲

可謂得端本始者矣因所已得而益探其本自身心以  
及政治益求所以端本始者斯則所以善終也固結天  
人培植國祚億萬載無疆之休端在於此臣以陋劣備  
員詞垣幸逢聖明媿乏裨補然區區誠懇不勝願望之  
私欲以芻言上贊萬一特竭庸鈍作十一箴一曰正始  
二曰脩身三曰敬天四曰法祖五曰勤政六曰講學七  
曰慎微八曰持志九曰謹好尚十曰簡近習十一曰溥  
仁恩纂葺舊言羸成條貫意存忠愛僭越不辭謹隨本



獻上臣無任惶悚戰懼之至

正始

皇皇大君其道不易克艱所先慎始之義始義云何若  
努之牙必審必慎乃固攸差惟昔楊朱見途而泣可求  
可西惟所意適嗣德在初伊告其君作事謀始易亦有  
云毫釐之差千里之謬發軔弗臧莫可藥救惟古聖哲  
謀遠慮深上承天意下副人心天人咸歸綢繆固結治  
以漸弘盛大之業苟簡微見百慮一訛即使改為其損

已多於惟我皇當陽出震中外臣民翹首觀聽新服厥  
命德亦惟新恭已端本追踪古人惟善惟惡厥有貳轍  
出此入彼更靡他說念茲伊始兢業自持尚觀治平式  
隆丕基

脩身

天下之本實惟君身身脩之化至疾至神脩身之功正  
心誠意由身而推家齊國治正心律已固有弗恭意誠  
及物幽明感通不誠不信不正曷令顛迷昏狂咎惡滋

甚仰惟聖哲夜寐夙興如對上帝如承神明制事以義  
制心以禮內外夾持罔或過舉聲律身度左矩右規一  
言一動憲天之彝身焉既脩是曰端本動無不化推罔  
不準於昭史冊巍巍皇皇萬世人主戴其休光彼昏彼  
狂遺譏罔極孝子慈孫不可湔滌敬告陛下監念在茲  
惡可為戒善可為師治化日洽聲光日著天德無私作  
配堯禹

敬天

在昔伊尹敬告厥辟曰天無親所輔以德天雖巍然視下則卑人君動息天必應之彼昏不知謂天不吾計棄天棄天無所不至天乃震怒降以禍災棄之若遺不可復回惟天愛君豈欲如是天之於君父子之義父固愛子教望實深子固絕之父寧不嗔是故明君天命是勅兢兢業業不敢怠忽敬天云何匪徒虛文勉盡君道循理脩身以是格天天乃用慰區區虛文天不容偽況此初服始承天命所視或短或修欽若聖皇名藩毓

德仁孝敬承天所眷錫自此以往益敬益虔用祈永命  
享祚萬年

法祖

書監成憲詩由舊章是曰君道靡愆靡忘聖帝明君孰  
非可法法必於祖益近而切耳目所逮氣體所承追思  
企仰寤寐牆羹矧惟臣民安此德澤思復見之鼓舞悅  
懌於穆孝宗遠承三王十八年在位其道彌昌不敢遊  
畋不敢縱逸商宗寅恭周王畏抑如漢文恭儉純誠則

殊如宋宗仁厚明斷有餘厚澤深仁深培固結豈惟則  
然有謨有烈尊親愛戴率土媚茲培植國命萬世賴之  
聖子神孫宜是則效紹述不忘斯謂大孝恭惟聖皇幹  
蠱惟新振起飭治如涉大津踐修前猷功光聖祖庶幾  
鴻名媲美萬古

勤政

昔益告舜罔逸罔淫奭也告武風夜罔不勤舜武聖人  
猶以是訓則凡人君其可不慎旦陳無逸諄切丁寧廢

興治忽監戒孔明天位惟艱萬機沓至遊豫宴逸政乃  
廢墜天運惟健永位高明君子自強法天之行未明而  
衣當盱忘食汲汲孜孜靡間頃刻沉復初政蠱壞之餘  
興化善治易轍改圖事之當為未易數縷匪倍其勤曷  
以克舉逸則日縱改悟莫從諱過拒諫乃罔克終帝其  
念茲願自振勵上師古人勵精圖治斯須宴樂慮妨萬  
幾毫髮縱恣終身之非慎終如初與勤相習庶績用熙  
治道以畢

講學

君心昏明政由治忽欲明無昏惟學為急難明易昏惟人心之常開以義理警以存亡心猶刀焉學乃砥礪心猶鑑焉學去塵翳思古明辟率是孜孜日就月將功期緝熙說告武丁學於古訓漢唐令主亦克好問惟帝為學胡可弗勤培養聖質啓發聖心然學之方當盡其道末而詞章則匪其要詞章技藝喪志無裨精一之傳聖學之軌朝有經筵講學之地立厥成規不以寒暑廢爰



咨爰擇侍從儒紳降畧陞級俾從容以陳或稽之經或  
參之史義理大原興亡大旨法善戒惡聖心昭明以達  
為政治罔不成

慎微

天下之事必有其幾幾之所伏至隱至微衆人蚩蚩昧  
厥先見惜焉弗覺縱恣怠玩豈知至隱至顯者存孰謂  
至微至著之原彼惟不覺乃迄禍害弗慮將長弗慮將  
大一星弗滅勢必燎原蟻穴弗治遂成滔天滔天既成

潰堤莫塞燎原既盛竭澤奚益大易有訓履霜堅冰絕  
過未著防禍未形未著而絕乃至無過未形而防卒以  
無禍故曰聖哲知彰知微衆人所忽聖哲所虞一念必  
謹中心恒惕如有禍患近在衽席帝實聖哲明照弗遺  
而況初服禍福之基敬哉念哉無隱無顯杜漸防微噬  
臍可免

持志

人欲有為貴持其志志焉弗持或進或退是故明哲發

強毅堅見之既灼守之弗遷志用正直不雜佞士志本  
抑畏不奪侈肆志在聽納觸諱靡尤志在問學固有輟  
休志在天德不雜人偽志存法古不安近治志明如日  
萬古常新志仁如天永冒萬年彼中才主執德弗固始  
非弗臧卒則改度亦有昏虐長惡遂非志存不善莫可  
轉移仰惟吾皇赫赫初政坤轉乾旋百度咸正陰霾清  
廓陽德煥昇旁燭無疆九幽昭明仰惟自今久暫如一  
如水必束無有改易道日以廣治日以純萬萬世下仰

瞻聖神

謹好尚

惟人之心衆欲交病端雖甚微卒罔克禁矧惟人君富貴崇高易縱難遏六馬弗調况茲憚壬善誘巧伺投間抵隙以售其計惟是上智燭理斯明屏絕嗜好湛然中局亦有嗜好道德仁義亦好善言亦好直士紛華可喜視之塵泥淵然澹然泝焉莫窺道用以周德用以植雖百憚壬無可自入苟或悖是多欲一萌憚壬抵掌競為

承迎心本易淫復此沉溺顛倒禍敗乃罔紀極欽若陛下正始之基羣小喁喁潛窺隱微治忽之分如反覆手操持維難若禦大寇惟帝念哉寡欲養心豈惟遠佞百福是臨

簡近習

君德修否實係近習氣體移養近習之執與吉人居習於其正默化潛孚弗覺其進與邪人居習於其非潛引默奪與化弗知漸染薰陶莫是切近鮑魚芝蘭古人所

慎近朱者赤近墨者玄齊言楚語以地而遷惟昔盛時  
特謹於是陪僕暫御罔非吉士旦夕承弼納之矩規欲  
為不善其孰與為細而起居大及為政乃罔不欽亦罔  
不令恭惟陛下即位之初奔趨盈庭莫辨賢愚嘗以是  
求諛佞正直直必進諛佞必斥進一正直衆正樂輔  
斥一諛佞衆佞自阻前後左右承疑交修有益無損聖  
德日休

溥仁恩

於惟天道有冬有春人君法天有義與仁冬主肅殺春  
主發育貞下起元剥則有復霜雪之後雨露以濡陽和  
昭融一氣而噓刑誅之餘乃有慶賞洪恩汪濊照澤生  
養元貞迭運天道以行仁義迭施君道以成於惟聖皇  
配天出治振綱整紀風飛雷厲赫赫肅肅恭行天誅元  
惡巨姦咸服其辜天威孔昭天恩未沛人知其威未見  
其惠况茲餘孽戰懼靡寧聖德包荒許以更新曠蕩之  
仁當以時出以釋危疑以安反側明明我后詎獨是遺

曰有所待以漸而施小臣僭冒仰贊萬一仁昭義行永  
奠邦國

右十一歲皆古人所常告於其君今之進言者所嘗及  
陛下所習聞者似臣之愚不當復以是瀆但求之君道  
實莫先於此況夫太陽照物物荷生成各輸其誠豈嫌  
同衆卒用綴拾以效區區辭雖鄙庸義則顯直但主激  
切觸諱實多亦恃聖明自可無諱獨慙臣學術寡淺不  
能各極其趣然其大旨亦具粗陳伏望陛下不以臣言



為可棄置之座隅燕閒之時俯賜省覽則於聖德聖政  
不無涓埃之助臣不勝犬馬愚誠為此具本親齋謹具  
奏聞伏候勅旨

文簡集卷一

欽定四庫全書

文簡集卷二

明 孫承恩 撰

鑒古韻語

翰林院編修臣孫承恩謹奏為鑒往古以圖惟治道事  
臣以庸愚備員近侍恭遇皇上德由天縱學造日新考  
索理義之原覽觀治亂之迹頃頒手教俯命儒臣欲於  
尚書之中摘取善惡之事編為韻語悉用常言庶便繹

思以為法戒臣惟自古帝王靡不各有所尚而黜或不驚於私縱有能寓意於斯文亦不過肆情於逸樂固未有留神政治致力身心如我皇上者也夫人臣孰無效忠之念而患無其階亦或有進言之階而又無其會今幸獲聖明之遇而況忝職分之司則此區區豈容自默臣竊惟君道莫先於稽古鑒往要在於得師非欲為博物洽聞之資將以為圖治修身之則常觀世之或治或亂未有不係乎君身故君之一動一行悉皆有關乎世

道是以必有堯舜湯文而後致雍熙之化亦必有唐宗  
漢祖而後收治平之功其或闇主暴君率致喪邦亡國  
事雖往矣史則昭然於典籍浩瀚之難窮固常有綱  
領徑捷之易見而況播之於篇什敷之於永言即其諷  
誦之間益見啓發之易知慕致懼內省思齊盖有惕然  
不能以自安油然而不能以自已是為君道之助誠莫有  
切於斯肆惟皇上特發睿思有此盛舉顧茲神識之超  
詣益見聖性之高明臣是以仰體淵衷勉摭薄識披歷

代之史籍究往古之是非上該唐虞下逮唐宋君之賢否善惡時之治亂安危或可以為師或可以為戒就其事蹟之叢委摘其得失之顯明人不必多而但舉其尤事不必該而惟存其大悉加櫟括俾可詠歌事皆即實言率徑情若夫上古非無聖哲之君而紀載濶疎無所稱述其他末世亦有善惡可紀而事蹟猥瑣不容槩詳故茲所陳僅止於此然而臧否之兼具庶幾法戒之並存苟能實措諸心則亦可以為準其有資於激勸豈惟

比乎弦韋臣愚職號論思義存獻納每慚尸素莫展報  
私幸及見聞乃爾僭越第媿臣識見闇昧問學荒蕪或  
是非之弗彰或詮次之無叙或去取之失當或抑揚之  
不倫或意不足以盡人或辭不足以達意凡此數者俱  
不能無況其為體雖不必於工奇而亦媿夫太拙雖賴  
陛下言不必於忌諱而亦懼夫太疎以此抱疑無以自  
解顧惟恃朴忠之有在兼自信告誡之當然輒用錄成  
隨本進上伏願陛下燕閒之際俯賜覽觀取其意而略

其辭憐其志而恕其僭苟有可采幸不棄捐時自披吟  
用以儆勵朝夕翹想夢寐勞懷則於身心政治之間不  
無毫髮涓埃之益臣螻蟻微忱冒瀆天聽無任恐懼願  
望之至為此具本親賫謹具奏聞

唐堯帝

帝莫陶唐盛魏魏冠百王德於天並運道合地無疆聖  
學傳千古欽明照萬方有生窮宇宙孰不戴休光

臣惟孔子曰大哉堯之為君也惟天為大惟堯則之



自古繼天撫世若二帝三王皆聖人也而獨堯為盛  
卓冠首出誠所謂高明配天博厚配地者矣執中一  
語開百聖心學之源至言其德則敬之一字實其統  
宗立本之地休光偉烈衣被宇宙千萬世下仰而戴  
之與天壤俱敝可也

又

帝德雖難狀帝心亦可言愛民常罪已敬德儼臨淵大  
化由身始神功格上玄於維千載下白日看高懸

臣惟堯之德大矣蕩蕩乎莫得而名矣若其心之所措則一民之饑曰我饑之一民之寒曰我寒之一民有罪曰我陷之其愛民之可得而言者如此富而不驕貴而不舒其敬德之可得而言者如此時雍之化自明德而推功業之隆覆冒無外今去堯之時幾千百載矣而其心迄今如見若日月之行天萬代瞻仰何其盛也

虞舜帝

克盡為君道無如帝有虞執中遵聖軌大智秉謙虛端拱雍容日時巡治理餘典謨煥千古彷彿見都俞

臣惟孔子以君哉贊舜誠以舜之為君也紹執中之傳廓大知之用經天緯地討罪制刑定朝巡考法度咨岳牧命九官凡君道之當盡者悉以次舉矣極有為於前享無為於後典謨具在迄今猶可想見其一時君臣都俞吁咈之氣象也

又

明德身為範人文日與開韶鳴靈鳥至千舞遠人來龍  
袞輝宸極南薰愜聖懷泰和千載遇稽首咏康哉

臣惟舜以明德先天下制禮作樂人文日宣鳳凰儀  
而有苗格垂衣拱手端已無為彈五弦之琴歌南風  
之詩天下向化世稱泰和之治者必先唐虞可謂千  
古獨盛者矣

夏禹王

大禹為君日勤勞恤萬民鐘鞮求善切典則貽謀真飲

酒踈儀狄當車泣罪人龜疇叙常道三聖實同倫

臣惟禹之為君也一饋十起一沐三握以勞天下之  
民懸鐘鼓之類以求善言制典則以遺其後嗣絕旨  
酒以示有國者之戒見罪人而悲其民之異心至於  
因神龜之出而畫九疇皇極建中萬世為君之道莫  
加焉漢儒董仲舒所謂三聖相授守一道者以此

啓王

繼世家天下承傳啓有為恭行知聖學伐叛凜皇威不

有仁賢譽其誰遠邇歸釣臺朝玉帛編簡有光輝

臣惟夏啓嗣位之初即有扈氏之亂啓能奮發率六師以征之觀其誓師也恭行天罰之一言足以見其能敬承繼父之道然其仁賢之譽固已預得天下之歸心是以釣臺一享玉帛咸會繼世若啓者亦可謂賢矣

太康

禹業中嘗替浸微有太康忽違忘祖訓逸豫恣禽荒洛

表留旬月民離失萬方怨歌勤五子今古有餘傷

臣惟太康盤遊無度畋于洛表至十旬而弗反犯厥  
祖禽荒之戒矣則安得而不喪邦也

### 少康

夏有少康帝崎嶇離亂間振衰能自競布德更親賢踐  
土光前業明禋配彼天遂令垂絕緒復見中興年

臣惟少康當王室衰微之日崎嶇離亂之間有田一  
成有衆一旅能布其德而任用其舊臣誅滅叛亂克

復故物祀夏配天若少康者可不謂中興之賢君哉

桀王

帝桀窮凶惡貪殘虐萬民矯誣空自託怨毒第招嗔天  
豈培凶德民應屬至仁南巢奔竄日民怨爾時伸

臣惟桀以暴戾失人心乃託天以誑惑其衆而致時  
日害喪之怨然天卒不可誣民卒不可強南巢之竄  
又何避乎

商湯王



勇智由天錫寬仁實性成執中不偏倚樂善絕驕矜改過風雷厲澄源玉雪清日新傳聖學萬古誦盤銘

臣惟湯以勇智寬仁之資而又能誠於與善勇於改過利欲不污日新自警是其檢身之功有如此者故能執中建極紹舜禹之統者非湯而誰哉

太甲

縱欲皇儀喪風愆祖訓真猶多不遠復幸不竟沉淪佑啓惟天眷匡扶亦老臣處仁遷義美萬古仰如新

臣惟太甲欲敗度縱敗禮違厥祖風愆之訓而居桐  
之後乃能自怨自艾是雖成湯之澤未斬而伊尹訓  
迪之功亦不可誣也夫聖人不貴無過而貴改過則  
太甲之處仁遷義豈不猶足為賢君乎

### 太戊

太戊尸君位嚴恭以自居天人原眇合敬畏靡差殊德  
政脩無闕祥臬正爾虛永年膺寶歷端拱治平餘

臣惟周公稱太戊寅畏嚴恭檢其身於天理至於治

民之際亦祇敬恐懼不敢荒寧享國七十有五年史稱其因桑穀而知懼修先王之政明養老之禮早朝宴罷問疾弔喪七日而桑穀死太戊之勤政敬德如此則其能弭災而致壽也宜矣

### 高宗

亦有高宗帝真稱繼世賢居崇知稼穡筆迹自幽潛恭默逾三祀雍和遍八埏試披三命讀聖學見淵源

臣惟武丁舊勞於外故其在位能知小民稼穡艱難

恭默思道發言雍和是以由身而達之政也則成嘉靖之休由政而著之民也則小大無時或怨和氣充洽治平日臻而有享國永年之效至若說命三篇備見論學次第後世人君有事於學者所當究心也

祖甲

祖甲冲年日幽潛田里間亦知諳穡事應自悉民艱惠欲周黎庶心存逮寡鰥未能儕二祖合與困知班

臣惟祖甲亦以幼冲居民間嘗知稼穡故其在位能

保惠庶民不敢侮鰥寡而亦如上太戊武丁二祖享國久遠然太戊近生知武丁學知祖甲則困而知者也

總述三宗

君道先無逸由來萬善門豈惟治之本實乃壽之原斂則神常固操之氣自存卓哉三令主應不媿湯孫

臣惟勤者衆善之所萃為治之本而又致壽之原也蓋勤則能收斂收斂則精神內固勤則能操存操存

則血氣循軌是皆致壽之道也而逸樂怠荒者反是  
焉商之三君雖有優劣不同而皆能盡其道者可謂  
不媿成湯之後矣

紂王

紂惡仍浮桀驕誇妄自賢漫云生有命不道罪彌天殺  
戮忠良遠竒淫妄婦憐倒戈躬衣玉牧野看當年

臣惟紂以小才私智自矜慢天虐民殺戮忠諫作竒  
技淫巧以悅妲己其暴戾若此而乃責命於天何其

誕妄也牧野之事豈非自取哉

周文王

穆穆文王聖詩稱敬止功謙卑靡侈泰徽懿見柔恭求道心何切仁民意莫窮勛華卓相望異代儼同風

臣惟文王以穆穆深遠之德無所不敬而止於至善謙冲抑損聖不自聖柔而非懦恭而克誠其求道也則已至而猶若未見其愛民也則已安而猶若有傷何其德之盛也宋儒程頤言文王之德似堯舜豈不

信哉

武王

赫赫維周武巍巍稱大君慎官崇激勸厚俗正彞倫仁  
德躬行盛謙虛訪道親皇風動遐裔五位澹凝神

臣惟武王之為君也任賢用能而官使慎崇德報功  
而激勸明重五教以正彞倫敦信義以厚風俗邇不  
泄遠不忘而極仁德之盛訪天道受丹書而盡求道  
之誠此所以皇風遠被垂拱而天下治也



成王

令哲遵先業師臣禮數隆天威嚴敬忘明德罔昏侗禮  
樂昭文治征誅振武功守成稱令主萬代仰高風

臣惟成王以令哲之資嗣守先業尊禮師傅敬迓天  
威克自明德制禮作樂以昭文治誅奄伐淮以振武  
功觀耿光揚大烈是以後世論守成者必首稱焉

康王

祖業遵無怠神人儼敬恭保釐介東土匡翼望臣工德

教案區洽圉越世空唐虞隔千載亘古兩時雍

臣惟康王克遵洪業敬恭神人命畢公以保釐東郊  
之任圖治諄切是以四夷賓服海內晏然百姓興於  
禮義圉圉空虛天下安寧而有唐虞之風泰和之治  
亘千古而兩見者也

### 宣王

周室中微日宣王勵志年謙虛資德教玉帛起遺賢旱  
魃為時虐憂勤契上天載歌江漢什武烈亦巍然

臣惟周自穆王以後王室漸衰宣王獨能勵精圖治  
以振起之任用賢臣順天心更治理喻德教舉遺士  
雲漢之詩述其遇災而知懼江漢之什美其武功之  
克成中興之美可以比隆少康武丁矣

厲王幽王

赫赫宗周盛人謀還自傾力行窮暴戾滅德肆驕矜嬖  
寵彞倫數征勞怨刺興柔柔瞻卬什千古鑒分明

臣惟周之王業厲王既壞於前幽王大壞於後俱以

暴虐侈傲厲則征役不息而致民之怨嗟見於桑柔  
之詩幽則寵褒似任奄人而易太子見於瞻卬之什  
豈非千古之明鑒哉

秦

土苴輕仁義凶殘法令崇詐愚非德化力劫豈心從多  
士泥塗裡遺經烈焰中千年狂暴跡遺穢永無窮

臣惟秦以戰鬪并列國吞宗周剗絕仁義純用法律  
詐愚黔首威制六合坑天下儒生焚先王典籍窮凶

極惡罪通於天歷千萬世不可湔也

漢高祖

一劍興王業三章易暴秦寬仁多偉度明達更殊倫好善若在已聽言如轉輪魯邦經一祀國脉倍精神

臣惟高祖以恢洪大度寬仁愛人除秦暴虐此其造漢之本而又加之以天性明達知人善任使樂善好謀是以成帝業之易也至於闕里一祀則漢家之元氣實係焉其識見卓越而規模宏遠矣

文帝

漢帝躬玄默依稀古風率先敦儉朴聽納事謙冲祇有仁民意都無振世功耄覲歌至德三十九年中

臣惟漢文帝躬脩玄默專務以德化民惜露臺之費衣弋絺之衣止輦受言却坐容諫勸農功除田租專以厚民為事而絕意於邊功遠略施及景帝民受其惠富庶康寧求仁君於三代之後豈有過於文帝者乎

景帝

儉朴遵先業謙恭亦靡遑寬刑極仁愛薄稅減經常坐  
致民生厚平將漢道昌守文能不媿千古繼成康

臣惟景帝恪守文帝之恭儉其寬刑則減笞法薄稅  
則為制三十而稅一海內富庶興於禮讓有刑措之  
風焉論守成賢主必以成康文景並稱信哉

武帝

盛氣臨區宇雄才隘昔人不勝多愆累無補制紛紜威

武行殊俗舟車起算緡表章功則有六籍麗高旻

臣惟武帝以雄才大略狹小漢家制度內事多愆外  
務紛更征伐四夷威行絕域既而海內虛耗美及舟  
車矣然當六經殘缺之後而獨能拳拳表章之先王  
之道賴以不墜此則帝之功也

昭帝

君德明為本而難在幼年日星照讒佞金石任忠賢阜  
俗休前政生民喜息肩聖聞昭達謚千載映遺編



臣惟君道莫要於明昭帝以十四歲而辨上官桀之詐信任霍光其明有可稱者承武帝虛耗之後節用愛民專意與天下休息頗復文景之業昭之謚可謂不溢美矣

### 宣帝

彊察中宗治王猷頓一新勵精勤綜核任法御臣民明作功雖著敦弘意頗湮輕儒迂德教千古議紛紜

臣惟宣帝以彊察為治信賞必罰綜核名實是以吏

稱其官民安其業然而雜用刑名不專德教周書所謂明作有功者固得之而敦大成裕之意則泯矣至其非太子以儒生不足任周政不可用則其所見不亦繆乎

元帝成帝

漢業何緣替元成二帝來儒柔難自植昏惑詎能回戚里叨天柄朝廷養禍胎莽新行篡竊元不咎平哀

臣惟元帝以恭儉好文之主然柔而不斷昏而不明

不能辯別邪正忠直之士多用獲罪成帝荒於酒色  
抑又甚焉寵任后家假以政柄王莽因之遂行篡竊  
其所由來漸矣不待哀平之世而後見也

### 光武帝

武致中興盛文成帝載熙持循每謙約治理更勤咨物  
愆無私好權綱只自持崇儒興教意永作後人規

臣惟光武當漢祚中絕討定禍亂恢復前烈致身太  
平謙約自持上書不許言聖勤咨治道講論每至夜

分宮闈無嬖倖之私耳目無珍玩之好明慎政體總攬乾綱至於表節義興學校重道崇儒所以垂範後世者大矣

明帝

尚論東京治人猶憶永平憲章勤慎守幽枉必昭明養老儀文備崇儒禮教興祇憐傷慧察雅度欠含弘

臣惟明帝在位恪遵建武制度明習憲章幽枉必達臨太學行養老之禮命諸儒執經問道禮教興行東

京文事可謂盛矣惜其少傷慧察弘人之度獨未優焉

### 章帝

愷悌由天性居然長者風御人羞察察臨政獨雍雍有詔褒循吏無心顯治功伊誰仁恤典頻著汗青中

臣惟章帝天性愷悌素厭明帝苛察事從寬厚議論雍雍有長者之風焉嘉襄城令之為政不擾褒以璽書而以刻薄求名者為戒至於恤民之政史不絕書

可謂仁厚之主矣

順帝

衆正登庸漸蒼生望治頻圉圉釋賢輔錫典厚亡臣仰  
諂明珠却興儒學舍新詎堪權倖在治道更逡巡

臣惟順帝即位之初一時賢士如黃瓊李固者皆以  
次舉天下想聞其風永釋虞詡於獄中悼楊震之以  
忠獲罪而錫之塋祭桂陽獻大珠惡其求幸媚却而  
不受起太學舍宇之頽壞者亦可謂賢而當時權倖

在朝根黨盤結竟不能救漢業之衰也惜哉

### 桓帝靈帝

逸德荒君度刑臣擅主權忠良空授命凶德欲彌天戾  
政招災異狂行污簡編豈知亡國論遺恨在他年

臣惟桓帝荒淫在位刑賞失道靈帝尤甚黨錮之禍  
流毒縉紳忠臣義士駢首就戮作列肆於後宮以貿  
易為戲造萬金堂以聚貨財虐政狂行致災招變後  
人追論亡國而痛恨於二君良有以也

晉

主國原非義貽謀況不臧守成無典則祖德自淫荒只  
有浮華競都無禮法防五胡雲擾日嗟爾禍源長

臣惟晉既以篡逆得國而復無典則以貽後禮教以  
淑人是以政事苟簡風俗浮靡紀綱缺墜廉恥廢滅  
則國非其國矣固宜其有劉石之亂也

隋

大業乘機會都來詐術中誰云胥吏道便與帝王同嗣



子奸天位狂心恣暴出不緣英主出何自息疲癯

臣惟隋得天下以詐術而又用法律為治廢太學黜  
儒道持此欲長治久安難矣而況以煬帝之狂暴促  
之二世而亡非不幸也

### 唐太宗

一代稱貞觀千年觀令辰韋弦親讜論鏡鑑比良臣宮  
女踈幽怨要囚感至仁武功與文德彪炳後無倫

臣惟太宗以武功定天下以文德致太平樂善聽諫

強仁慕義賢臣比鏡鑑以考得失忠疏比弦韋以藉  
師資怨女三千放出宮死囚四百來歸獄貞觀之世  
天下乂安四夷効順兩漢以後所未有也

玄宗

內難清夷日當年亦治平開元醒裡過天寶醉中行蜀  
道風塵地西宮掩抑情有初終不竟作戒甚分明

臣惟玄宗以臨淄王討定韋后之亂即位之初勵精  
圖治朝廷清明天下康乂晚歲昏德縱恣奢侈以底

危亂回視初年真若醒醉之異者詩云靡不有初鮮克有終其玄宗之謂乎

肅宗代宗

克復勛日勤勞亦守成權闡播威福悍后障聰明繼世惟姑息何時見治平釀成藩鎮亂消沮媿王靈

臣惟肅宗以勤勞克復兩京亦可謂賢矣而外制於李輔國內制於張后至於代宗皆以姑息為事不思經世遠略朝廷威令不行藩鎮之亂唐室之微實自

此二君始矣

德宗

聚斂非王政偏私豈建中天資傷忌刻性學欠昭融賢  
輔終疎斥奸邪是顯庸治平雖有志才小竟成空

臣惟德宗之為君急聚斂務偏私疎斥陸贄信任裴  
延齡盧杞是以雖有平一天下之志而卒無所成宋  
儒范祖禹謂其志大而才小心褊而意忌強明自用  
不能推誠御物尊賢使能斯言盡之矣

憲宗

法祖追洪烈勤咨想治平威行藩鎮戢政一紀綱明謀以明能聽功因斷乃成遠猷雖弗竟亦不媿中興

臣惟憲宗即位之初慨然有志於貞觀開元之治數與近臣講論治道日旰忘疲討叛誅亂而藩鎮効順政權歸一而紀律再張蓋其天資明斷是以能信用忠謀而成中興之績也

文宗

寡欲心清曠天資亦厚寬虛襟容直諫勤政絕遊觀志為興衰切才於撥亂難恥為凡主恨空使後人嘆

臣惟文宗天資甚美清約簡淡寬厚恭勤誠有可稱者然深惡朋黨而不知所辯欲去宦官而不知所倚則由其才之不足耳獻赧之比君子惜之

宣宗

法賞無偏濫憂勤有祖風儉能財用節樂與讜言從一紀餘安靖羣情感大中誰教猜刻勝遠畧未恢洪

臣惟宣宗用法無私重惜官賞憂勤節儉樂於聽言  
故大中之治海內安靖後世思之則亦唐之令主矣  
然其天資忌刻以好惡之私不能委任賢相圖謀治  
道而反或斥逐之故當時雖號稱小康然藩鎮之亂  
法中官之擅權猶自若也唐室之亡卒坐此二事則  
其於經世遠畧亦昧矣此則為可恨也

懿宗僖宗

唐室懿僖日真為板蕩辰普天多寇盜繼世總昏闇已

是垂亡地猶堪殺諫臣誰云天降罰釀惡盡由人

臣惟懿宗以昏德在位唐室大亂盜賊橫行僖宗繼之其惡益甚殺三諫臣足以決唐之必亡也

宋太祖

仁厚開基異崇儒聖道尊至誠寓杯酒心事洞諸門慎獄欽民命懲奢塞敗源身先端化本彷彿見王言

臣惟太祖以仁厚立國崇儒重道親贊孔顏數詣國學以杯酒釋兵權而人感其誠洞開諸門曰似其心



之無邪曲慎獄而定大辟覆奏之法懲奢而碎七寶之器至於自謂夙夜畏懼以德化人所謂大哉王言者庶幾近之矣

### 太宗

罪已消天變仁民隱至情厚倫施義衆勤學購遺經節為山林重功於宦寺輕不慚稱令主恭儉更仁明

臣惟太宗之為君其敬天也因旱蝗欲自焚而致霖雨因彗星肆赦而彗滅其仁民也廣醫方之賜立常

平之倉貸粟義門以勸風化購求遺書酬以官賞徵處士不至顧嘆其高節恐宦官與政寧略其有功恭儉仁明可謂有帝王之畧矣

真宗

章聖幾賢主咸中亦治時愛民釋逋繫聽諫納危辭重道頒經籍憂蝗罷宴嬉惜哉祥瑞事白璧見瑕疵

臣惟真宗在位屢除天下逋稅放釋繫囚田錫居言職凡上五十二疏言率剋切無不容納錫死嘆其直

賜九經於學校因旱蝗而罷宴禁樂亦賢君也然而  
崇奉道教天書之詐則迷謬甚矣豈能免後世之譏  
乎

### 仁宗

仁儉承先業遐荒仰治平饕因惜費減物為愛民輕講  
學忘炎暑陳圖列御屏黎民懷惠澤翼世痛昭陵

臣惟仁宗以恭儉仁恕其節費也或中夜思食恐遂  
為例而止或以其太費而媿不堪出通天之犀以合

藥療民而不靳惜經筵語侍臣以甚暑未嘗倦命圖  
無逸篇於屏風朝夕玩視可謂盛德之主矣宜其惠  
澤感人之深也

英宗

讓德終喪日其如歷數歸仁心放宮女孝道協慈聞臨  
政叅今古求言裨缺違史書經統一千載仰前徽

臣惟英宗以賢明繼統其在位也放釋宮女克盡孝  
道臨政必求朝廷故事與古昔所宜詔中外言時政

闕失命史官編歷代事迹司馬光資治通鑑所由作  
焉統一諸史博綜羣言垂惠後世多矣

神宗

一代有為君齊家更守文遊畋元不事土木總無聞法  
制熙豐盛兵戈遼夏勤傾心相安石國是日紛紛

臣惟神宗以奮發大有為之志恭儉守文無有逸德  
可謂賢主而志意太銳聽信太隲務更張而開邊釁  
蓋自王安石大用而天下始紛擾矣

哲宗

元祐更新法拳拳復祖謨宣仁元聖哲馬呂亦匡扶幸  
免調停誤終為紹述誣惜哉全盛業坐見日西徂

臣惟哲宗以冲年即位上有宣仁后之聖下有司馬  
光呂公著之賢改熙豐之法復祖宗之舊亦賢君也  
至晚年小人假紹述之言於是黨籍禍興君子盡斥  
而宋政大弊矣

徽宗

帝聰多技藝土木漫然荒既作神霄會仍開花石綱勞  
民崇艮嶽違好伐遼陽為墮豐亨說終當出幸亡

臣惟徽宗天性機敏而不善用留心技藝崇奉道教  
惑方士林靈素之言而作神霄之會惑蔡京豐亨豫  
大之說興土木事遊觀置花石綱造萬壽山違好敗  
盟開邊召釁而卒為金人所乘顛沛北狩悲夫

高宗

五馬傳初渡皇圖喜再開守文堪令主撥亂欠雄才和

議誰教信精忠漫作猜偏安方自足恢復見悠哉

臣惟高宗崎嶇南渡再立邦家恭儉有餘明斷不足  
可為守文之主而非撥亂之才也且帝既悟秦檜之  
奸榜之朝廷矣而終墮和議之計既知岳飛之精忠  
而復使檜得以誣其罪而殺之所謂明斷何在也其  
不能恢復也宜哉

孝宗

恢復當年志英明自爾殊仁行社倉法勤寓敬天圖武



烈心徒競謀謨意總疎紛紛多論議畢竟墮模糊

臣惟孝宗以英明之資有志恢復為南渡諸帝之首  
是以敬天勤民之意見於政事者如此然有其志而  
不得其道故雖躬親騎射閱武治兵而不能總攬羣  
策動違事幾紛紛之議卒成空言而已

理宗

帝也中才主恭儉亦守成用人雜忠佞行政半昏明不  
有遵行實空存理學名只餘表章意正論息爭衡

臣惟理宗在位崇尚道學表章儒先之言可謂賢矣  
然所貴乎崇尚者不徒向慕誦說而要在舉而措之  
身心政事則儒者之效白矣理宗無遵行之實而徒  
慕其名故用人則邪正並進政事則治亂相半斯皆  
務名無實是以無補於國事也然其意向之美使理  
學大明於世則其功亦豈可少哉

度宗恭帝

戎馬憑陵日宮闈恣樂辰非因天有惡自是國無人忠

憤嗟多士安危倚大臣慤勤德祐詔哀誦不堪論

臣惟宋至度宗之世元兵日迫喪師失地殆無寧歲  
天下事十去八九矣而帝方溺意於酒色若罔聞知  
則國之亡也果天耶人耶又是後三學之士屢疏宰  
臣悞國忠憤激切而一切置之不理其有避難遁去  
者往往相繼雖有詔戒禁者而不能止也為國至此  
亦可悲也

總論

往事今之鑑遺編蹟未陳是非須決擇終始貴持循隨  
善皆歸治無非不敗身商書三四語千載可書紳

臣惟前代之事具載史籍考其善惡以為法戒惟慎  
所決擇而固守焉耳夫善亦多矣曰敬曰仁曰誠曰  
勤曰儉曰明曰斷曰納諫曰好賢曰安靜曰崇儒重  
道曰勤學好問皆善也夫惟二帝三王始為全德餘  
則難乎其備矣而皆足以致治其衆善之類相反者  
或有一焉皆足以致亂然其治也以善之多寡為優

劣其亂也以惡之多寡為速遲則有志於治者其於  
善也固當務其全而不可安於偏求其多而不可安  
於少其於惡也可不兢兢焉惟恐有一以兆危亂哉  
商書曰德惟治否德亂與治同道罔不興與亂同事  
罔不亡終始慎厥與惟明明后斯言誠君人者所當  
佩服也

又

於穆維天運君心法自彊聖謨猶炳炳天命凜皇皇睿

哲皇今是欽明道日昌願言期勿替千古配陶唐

臣惟乾之大象曰天行健君子以自彊不息天以至健而常運人君以法天而不息不以人欲害天德所以自彊不息也天德者理也降衷之所賦古訓之所載非學無以為考索之地非敬無以為踐履之基主之以敬輔之以學然後理明而德全恭惟皇上以上智生知之資不自滿假嚴恭抑畏稽古窮經所謂敬與學者陛下既已得之矣臣復何言惟願常存此心

永遠弗怠以益造乎高明昌大之域而一毫之人欲  
莫或間之則所謂法天行健者在是而真足以配帝  
堯之盛於千古之上矣臣不勝惓惓

文簡集卷二



欽定四庫全書

文簡集卷三

明 孫承恩 撰

頌

聖壽齊天頌

具官某謹奏為恭頌聖壽事嘉靖三十一年八月初十日恭遇皇上萬壽聖節臣愚忝受恩私不勝忻忭區區祝願無能効誠謹撰聖壽齊天頌一篇辭雖拙劣意實

勤懇謹用繕寫隨本進上伏乞恕臣僭瀆俯賜覽觀臣  
惟天以積氣運行於上是為萬物之祖覆燠羣動生養  
始終蓋有道焉故曰為物不貳天之道也雖玄穆不言  
而所以主宰於冥冥者若有治焉故曰天無私覆又曰  
福善禍淫天之治也若夫運亨毒歷古今不倚不測不  
震不陂又有壽焉故曰悠久無疆天之壽也人君者實  
天之所厚而盡付以民物之責故曰大君天之宗子中  
天下而立統御萬方臣妾億兆所以代天之為者則有

君之道也有君之治焉故曰格于皇天格天者君之治也法天以為德配天以為治則有君之壽焉故曰萬年天子萬年者君之壽也上古聖神羲軒堯舜湯文遐哉邈矣降是而下寥寥焉洪惟我皇上以大聖之德居大君之位三十一年于茲純誠體道仁昭義立德博化廣緝熙敬止精一無雜法天之道至矣四海九州均躋治平垂髫之童戴白之叟莫不歡忻怡愉鼓舞生養於春臺玉燭之下配天之治何以加焉道本法天治足配天

是誠紹羲軒姬堯舜邁湯文於不言矣則齊天之壽非  
我皇上孰克當之臣聞之傳曰自堯舜三代以來莫不  
稱天以舉事至尊至大而極壽誠莫天若君即天也臣  
事君猶事天也則所以祝君之壽不徵之天曷以哉臣  
不佞竊擬詩人頌禱之體作萬壽齊天頌一篇繕寫上  
進臣干冒宸嚴無任戰懼恐慄之至頌曰於穆乾元磅  
礴渾淪輕清上浮攬幬無垠廓落穹隆高明悠久懸象  
順成主宰萬有二氣闔闢四時錯行列宿繁張兩曜代

明潤以雨露肅以雪霜鼓以風雷福以禎祥惟貞惟健  
不二不息普之無心運之無迹抑高舉下損餘補虧孰  
究孰測孰綱孰維邇之無始引之靡窮浩浩蒼蒼莽焉  
圜穹居高無為監下有赫大君宗子實昇有德於惟我  
皇天挺神聖配天在下正位凝命執符御鼎立極建中  
心包元理身代化工神炳萬幾智周八表與時偕行憲  
天弘道號令雷動政教風行經綸制作炳煥日星恩澤  
春煦刑威秋肅莫非至教以培以篤禮秩天常樂宣太

和以陶以淑以漸以摩七政式齊九功丕叙玉燭常調  
金輪永御大化浹洽洪恩龐洋德冒四極仁育八荒逍  
遙翕聚太一黃庭冥思玄化虛養谷神丹丘乘鳳玄圃  
御麟人瞻景福天錫長春大道難名至德無極玄象布  
夷雷聲淵默茫茫堪輿蕩蕩明德始兮何肇終兮疇測  
維茲秋仲聖誕再逢元樞繞電華渚流虹蓂收洒塵少  
皞應節金風薦涼玉宇澄澈萬邦玉帛重譯梯航虞庭  
結佩漢殿捧觴垂拱穆穆舞蹈踰日月光華天地開

張小臣庸鄙翰墨濫司頌禱不文曷罄微私稽首龍庭  
祝我皇壽與天齊年萬壽萬壽

萬壽中天頌

臣惟帝王居天之位曰五位享天之福曰五福位以五  
言言至尊也福以五言言至備也而數之有五則如天  
度之方中而所居所享者正無疆也洪範五皇極曰皇  
建其有極斂時五福夫皇極以五居中而其獲福亦必  
以五焉數以五為中則自五而十而百而千而萬固皆

由此以馴至乎其極是以聖人貴之也在昔唐堯中天而生自十六即帝位而享有聖人之壽與古之義軒不殊至於大德得壽莫如舜周王壽考莫如文然舜則三十登庸三十居攝而文王受命惟中身二聖人者雖亦中天而興而其所以享天之福殆未為全際其盛言中數者必其受天之眷既久而中於天者正隆也然則自古迄今應運而獨盛得數而無疆者是孰有加於我皇上哉皇上年甫十五而纂承大寶今茲紀元歷三十有



五年而聖壽適屆乎五十之會五而復五生生不窮正  
猶乾象中天於穆而不已也乘其數而積之極其象而  
擬之聖壽萬年端可測識而臣子祝頌之願則何有窮  
已也臣荷蒙聖恩賜歸田里此生餘年實沐生成顧犬  
馬齒邁無庸竭力惟瞻禮天樞虔祝玄筭此則少可自  
効毫髮茲遇聖誕五旬福祉天高萬壽伊始欣躍感激  
不勝惓惓輒不揣僭冒謹撰萬壽中天頌一篇繕寫上  
進臣無任隕越惶懼之至頌曰昊天穹隆積有常度一

氣渾淪有五參互十百千萬五則為中相得而合恒久  
不窮巍巍大君繼天立極中正以觀乃見天則位曰天  
位九五飛龍福曰天福備五攸同五位五福數居中正  
高比天樞方升莫並在範皇極配居五尊歟福以五實  
惟其倫中天而興惟堯為大遠古羲皇享國俱邁舜文  
遐祉在後則然律以中數若靳於前欽惟我皇超越今  
古德配上玄多歷年所英年御宇三五貞明乘五而七  
久道化成華渚流虹天開黃道五袞當陽南極高耀五

氣叶慶五緯發祥玄皇降鑒申錫無疆無為而為無逸  
乃逸恭已南面日中未昃積小高大五五相生如岡如  
陵以莫不增極數知來五五不息如淵如泉流行時出  
稽首聖皇壽考維祺由五逮百建極承釐稽首聖皇應  
運獨盛由五至千執中有慶稽首聖皇得數有常由五  
臻萬居尊彌光臣荷皇仁眷及垂老刻骨難酬敬祝壽  
考瞻禮霄漢遥叩九重此身猷畝敢忘敬恭竊比康衢  
庸致頌祝聖德日新聖躬萬福聖躬萬福聖壽萬年純

亦不已歲歲中天

慈孝獻皇后山陵禮成頌

具官臣某謹奏為述大典揚大孝以光聖德事臣惟孟軻氏曰養生者不足以當大事惟送死可以當大事恭惟皇上頃以慈孝獻皇后山陵勞心焦思不遑寧處慎重周悉爰咨廷論言人人殊未當聖心蓋皇考睿宗顯陵既在漢南皇妣義無遠隔此實人子真切至情而況皇上以聖人行大孝盖尤有超出尋常萬萬者且地道

貴靜顯陵既越歷年歲休徵協氣隆盛完固無容他議  
肆我皇上御六飛躬詣展謁閱視宅兆天啓聖衷一見  
而決孝誠感格神明默佑慈宮南祔大禮告成聖心以  
寧天下臣民莫不欣慰是非偶然也臣惟人君之事親  
生以天下養殯以天下葬此天子之孝帝王所同而皇  
上今日之舉盛大彰烈尤曠古未聞者誠不可無以昭  
示萬世臣以庸劣濫與詞垣通蒙皇上擢置宮僚愧無  
毫髮裨補顧惟以文字贊述聖德乃臣之職差可自効

謹撰慈孝獻皇后山陵禮成頌一通繕寫進上猶惜臣  
前弗在從行之列目擊儀文制度之盛掛一漏萬又學  
陋才薄述義膚淺擯辭鄙庸不能極揄揚之美臣大懼  
獲戾仰惟皇上矜而宥之臣無任云頌曰皇帝臨御

德冒九有百禄穰穰荷天之佑乃歲戊戌季冬之辰皇

妣獻后厭世上賓帝在諒陰音閭哀慕誠切圖襄大事若

抱冰檠帝念襄事重大維艱親體攸附朕敢弗勉

叶平聲

帝睠衡襄皇考是宅朕忍皇妣阻越南北爰咨爰度羣

言盈廷百慮一訛莫之靈承乃歷西山亦暨太峪不二  
曷疑不疑何卜翼翼顯陵既安既寧奉遷來合孰主孰  
憑帝曰嗟哉朕其南狩躬履相度庶幾無謬帝乘六龍  
乃時巡行元僚卿士六師烝烝黜幽陟明省俗考制天  
運日臨鸞輿戾止莪莪純山蜿蜒盤礴鍾神毓秀先皇  
攸託天與其崇地與其厚雄峙屹立萬靈是守皇上展  
謁顧瞻而咨吾親安靈亶莫是宜並厝同藏乾坤合配  
造化締構萬世之遺

叶去聲

淵衷既定神天順之乃迴六

龍言歸京圻乃禴乃告祖于獻禰諏吉卜良爰以從事  
帝咨於朝二三重臣汝侍慈宮實代朕身帝咨於朝遴  
選百辟汝相茲行各供爾職帝用齋祓秉執精虔錫祐  
冥冥默祈穹玄乃申戒諭汝臣汝鄰惟朕哀悼汝體朕  
心師拜稽首祇受休命小大駿奔罔敢弗敬乃奉慈宮  
乃駕龍舸千夫挽維百夫將舵元戎桓桓翊衛後先虎  
盾龍旂照耀川原肅肅侍從察舉弗式明明奉常典祀  
孔飭千艘霧擁萬楫雲隨殷天動地填谷塞涯遠邇守



臣奔走爭疾瞻望拜稽迓迎絡繹郊陳原設牲醴苾芬  
感嘆追慕皇妣聖仁泛濟逾淮涉江徂漢駕濤凌瀾度  
越渺漫赫赫皇皇巍巍堂堂川岳效靈神祇致祥陽侯  
先驅馮夷後翊風伯助利雨師降澤龍舟閒閒五兩翩  
翩安行中流其安如山慈宮至止天開日熙雲烟動色  
江山發姿湯沐舊都聖慈降陟耄倪嘆嗟舉手加額乃  
籲先皇乃寔玄宮雲堂月竈並位雙龍嚴寢既扃靈氣  
愈固亘地終天永奠萬古若益而完若增而竒複嶺參

差重岡環迴蒼龍矯矯白虎圖圖朱雀岌岌玄武嶷嶷

叶上聲

雲楣繡栢金楹玉碣大庭黃殿崢嶸赫奕靈草瑞

木森羅周遮鸞鳳翔翥蛟龍盤拏重城山峙萬雉雲列

包絡林巒掩映日月玄化沕穆王氣鬱蔥聖子神孫祚

流無窮大禮告成報命維亟帝孝哀思乃慰乃懌普天

並休率土同春一人有慶賴及兆民皇帝大孝慎終是

圖允信允誠百王範模皇帝大智玄理昭晰衆言紛靡

靡得而惑皇帝大斷神謀潛施機發矢決鬼神莫違皇

帝大聖神明合德謀無弗成動罔弗獲盛儀曠典古無  
前聞惟皇創之畢義盡倫功成道竟上恬下熙凝神穆  
清澹然玄虛無為為無事事事迎釐三神錫福庶類  
卜征考祥元吉允臧超周邁殷並虞配唐萬壽萬齡永  
立民則微臣作歌以播無極

擬嘉靖聖德頌二篇

掌詹事府事吏部左侍郎兼翰林院學士臣孫承恩謹  
奏為恭頌聖德事臣伏覩邇者皇上渙發德音諭鎮撫

司恁衙門原監犯人楊爵周怡都放了又昨該禮工二部傳奉聖諭朕思京城九門地大人衆有貧窮死喪而不能葬者有四方客死而不能歸者暴露屍體朕甚憫焉着五城御史督令地方查有此等即以義地瘞之臣竊惟楊爵周怡俱前以言事得罪皇上弗即深咎但行監繫乃者宸衷天啓不究其譴責特與釋放中外臣民莫不鼓舞懽忭仰皇上天含地容之量真度越前古又惟皇上加意黎元思周慮悉前念民間疹疾節次發出

御藥遣臣某等施散茲復念不幸死亡者窮民無主殯  
埋特有此舉皇上愛民於養生送死備矣赦過宥罪聖  
主之宏恩憫艱恤窮王政之大務皇上於茲二者舉行  
不出旬餘仁之至義之盡大聖人之德化真與天地同  
流臣不佞備員詞林以文字為職忝逢盛事念不可無  
一言以贊述洪烈謹依唐韓愈宋石介所撰元和慶歷  
聖德頌臣今撰嘉靖聖德頌各一篇篇各三百六十字  
雖才識短淺不足上擬古人而區區螻蟻之誠聊藉以

自効輒敢繕寫隨本進上臣干冒天威無任惶悚隕越  
戰懼之至為此具本親賫謹具奏聞

其一

於穆聖皇統天御極陽煦陰肅坤闔乾闢乃廿四載秋  
仲日吉皇心有感渙號大發惟帝若曰朕荷洪業惟爾  
臣工予輔予弼君臣義合禮恭臣職古稱諷諫曉人宜  
識往有二臣陳疏過直朕心頗迂薄嘗示罰朕茲念之  
諒彼誠怛狂悖雖有忠愛是泄矧彼懲創悔悟必切蠲

除辜愆俾出縲紲朕於臨下賢否能別朕於好惡順帝  
之則賞善則浮紀過不越咨爾臣庶咸聽予說罄竭臣  
恭毋自造孽體朕至懷亦罔震懾惟帝一言星日昭揭  
天地鬼神咸布在列德音洋洋警動六合臣庶稽首仰  
帝明哲惟帝一心淵穆莫測如天之運如神之默皇赫  
斯怒莫或敢過如雷斯迅如電斯掣皇心悅豫怒不留  
匿如冰斯泮如霧斯釋稽首聖皇天地合德並育蕪容  
無終惡嫉稽首聖皇並明日月無遠弗燭無幽弗徹稽

首聖皇神武不殺操執乾綱無敢玩褻洪恩汪濊帝澤  
充洽君子奮庸姦宄遏絕耄倪歌呼途巷歡愜遐荒傳  
播罔不畢達大猷允升無有間隔鴻圖永固無有杌隍  
超周邁商堯禹合轍彼宋彼唐孰是方絜千萬年歲光  
耀史札

其二

於維上天萬物父母大君宗子天所畀付天能生物不  
能遂物左右斯民大君之責生欲有養終欲有歸不有



王者孰主孰依維昔文王澤及枯骨掩骼埋胔王政之  
一世衰俗降治不法古虛文雖存實政莫覩流離委頓  
掩覆莫施下食螻蟻上食鳶鷂吾皇聖神心含大造惠  
鮮莞鰥綏輯饑殍念厥沒者暴尸棄骸孰憫孰惻顛沒  
草萊陰雨霜月寃語吟嘯朕主神天寧不汝悼天地雖  
大或缺其仁吾皇一念旋乾轉坤乃召司徒汝其度地  
悉俾瘞埋汝勿怠事乃召宗伯汝其詢咨撝括以行俾  
無或遺相彼王郊其土埴埴墓人塚夫乃經乃畫千夫

如雲萬鍾如雨勞相踴躍畚築具舉屋如堂如斧如坊  
如崇崇連連鬱其岡如于殤于厲于士于旅是憑是藉  
是宅是處焄蒿悽愴若或有知枯壤銜恩冥途結悲周  
文則仁據所目見善推其為皇澤丕遍皇澤丕遍逮于  
重泉矧也吾人覆冒曷言至和薰蒸玄化塊圪動植蒙  
休民不夭折宇宙清肅罔有害灾恠妖藏滅諸福畢來  
補天不能助地不及百神効靈左右拱翊稽首聖皇壽  
萬千億

瑞雪頌

嘉靖辛丑歲月正元旦大雪浹日惟我皇上御宇以來  
治化旁洽和氣上蒸乾坤清寧風雨調順昨歲季冬偶  
爾愆陽雪未降澤皇上憂思勤民避殿不御親行露禱  
者彌旬精誠上通天眷屢回雪意頻作鬱且未施皇上  
惓惓憂形宸諭懇禱益虔以冀終惠至是雪果大降臣  
謹按傳曰雪者五穀之精元旦一歲之始元日而雪雪  
以元日是其為豐年之兆太平之徵不偶然也夫景雲

甘露瑞矣而未切於民芝草醴泉瑞矣而未切於用皆有歌咏以彰盛美矧今歲朝瑞雪應禱錫福黎元其為休嘉尤大且重臣備員禮官法宜紀述贊揚聖化謹拜稽首作瑞雪頌一通以獻丹衷頌曰明明天子秉符握乾存心天下加意黎元皇皇上天神化罔測精祲維時錫祐以德昨歲暮冬時雪少愜豐隆蘊澤歲事曷占於惟聖皇若恫在躬憂勤夙夜重軫田功避殿齋居存仁淵默歷旬匝月虔禱靡斁乃命宗伯乃勅太常欽若玄

典式布儀章精誠孚契天人流通耿耿聖心對越昊穹  
孰云幽遐感應則邇同雲屢合若有所俟越歲元日乃  
發祥禎滕六用事瑞雪大零雪之初零綏綏若緒瑤為  
之臺玉為之陞雪之再零沉沉無聲千山被縞四野鋪  
瓊近而睨之龍伸鳳抑遠而望之六合一色漣漣皚皚  
繽繽紛紛晶瑩皎徹眩目爽神一歲之始三元之首不  
此日先不此日後疵癘潛伏灾眚被蠲螟蝗入地豈也  
有年宸衷以寧憂勞用釋匪一人之私為我民懌士惟

於朝農忻於里咸荷帝仁名言曷以詩紀雲漢書稱桑  
林自古為烈矧我于今於穆上帝居高聽下朗焉九清  
神功不假天子明德上帝降康不言響應丕顯允臧聖  
德日崇天眷彌固立我民極永膺純嘏

禾麥重祥頌

我皇上御極之二十有二載為嘉靖癸卯先是壬寅歲  
我皇上以旱熯軫慮爰稽古制創雩壇崇事極勤誠焉  
自是玉燭調均雨暘時若乃今年秋山東泰安州守臣

以嘉禾瑞麥進既而西苑督理農事侍臣及大司農亦獻瑞穀內外若出一揆其植皆一本二三穗至四五穗者繁然若綴瓊珠精華巧妙迥異凡頽我皇上念事闕民生非他瑞比乃擇吉燂燎以奏上玄明裡以告清廟盖所以答神庥昭景貺甚盛典也臣謹按傳記有云王者德冒下土則神禾嘉穀生夫東獄生物之府御園得氣之先又泰安者大治吉昌之名也禾麥之生適於其地靈異之至豈不昭然可知稽之往牒若周禾之異畝


漢麥之兩岐是皆各有其一惟我聖祖高皇削平前元  
之亂神功聖德克當天心於時則有禾麥並見乃於今  
日而再覩焉仰見我皇上盛德洪仁盤天極地所以名  
此奇瑞與皇祖之世先後同光皆本我皇上一念敬天  
勤民動格帝衷故雩祀膚功天休滋至覩茲洪眷允兆  
康平足以驗聖祖神孫萬萬年宗社無疆之庥也臣本  
庸陋備員禮官輒不自量謹撰蕪頌一篇上塵睿覽雖  
天地之高厚難於名言而我明一代之庥祥聊以紀其



盛云頌曰惟天佑民惟辟奉天奉天克配宰握化權於  
維聖皇臨御九土道契重玄德超邃古睿思攸繫歲事  
維勤昔也旱暵軫瘁我民雩壇崇崇祀以時舉驅役風  
雷調燮暘雨雨暘時若風雷攸從百靈受約並奏膚功  
天維降康地維獻祥靈貺駢集以佐我皇睠彼東藩泰  
山之麓造化發生元精滲漉亦有內苑密邇帝居鍾和  
毓粹神靈所儲有麥斯奇有禾斯異被隴連塍揚翹吐  
穗芄芄穰穰蕤蕤煌煌或三或五聯穎合房龍鳳肖形

雲霞被色連蜷繽紛莫可殫述司農自內守臣自東呈  
祥獻瑞不約而同迪若古先曰周曰漢一也僅聞並也  
則罕維我聖祖闢乾坤易亂以治乃致斯珍祖孫同  
聖先後式符視周有麥視漢有禾天子曰都荷天之錫  
曷報曷稱明禋孔飭天子曰都列聖之庥曷報曷稱祀  
事聿修慶雲甘露豈無佳禎凡茲為瑞亦兆治平惟麥  
與禾亶切民生朕實在茲非可他擬稼穡維艱民食攸  
倚天心仁愛歲事以登民無阻饑朕則用寧於維聖皇

仁民若子允懷保之無有窮已於維聖皇仁同於天蠕  
蛻肖翹並育穹玄物阜民豐時和歲稔犴狴空虛邊疆  
宴寢稽首我皇民生保息茫茫堪輿同登壽域王政大  
成王化大行臣作頌詩垂億萬齡



文簡集卷三